

Tourenbericht FaBe-Lager 2023

zur Melodie von Mani Matters „Zündhölzli“ von Daniela, Jaqueline und Sandra

Am Samschtig Mittag simmer gsprunge
und händ gwerchet a de Schwelle
Natürli nie ohni die Lischte
i de Excel-Tabelle
und das Rucksacke packe
nimmt au das Mol e keis Änd
will doch immer meh ie sött als d'Rucksäck Platz här gänd

D'Fahrt uf Landquart und Davos
die läuft tüffenentspannt
erscht im reservierte Bus
hocken alli ufenenand
doch zum Glück chöne mer bald use
und d'Schue zämebinde
und mer hoffe dass mer das Mol de diräkt Hüttewäg finde

Völlig duregnässt und verschwitzt
chömme mer denn ufem Sattel aa
und das Seeli lueget ois früsch
und blau und harmlos aa
Die erschte sind am ine gumpe
die andere lueget wos Badehose händ
am luute Gschrei a merke mir es brücht es Iistaucher-Patent

Nacheme erfrischende Bädli
simmer ändlig ufeme Wägli
bi dr Hütte obe aacho
und händ Zimmer in Beschlag gno
S'het nid lang brucht denn händ alli
ihres Plätzli ghaa
und de Hüttewart het sin Speech zum z'Nacht ghalte ghaa

Am Mäntig hämmer d'Rucksäck packt
und sind sofort zrugg zum See
und hend klätteret und kräsmet
bis käi Hornhut me hesch gseh
Chatzewösch und Lunch am See
Chasch au ohni Gurke neh
und ufs Znacht semmer denn au nümme ohni Dani meh

Am Zischtig Morge hämmer üs grad alli
amne Seili abegloh
und händ güebt wie' isch
wenn'sWägli wäri numme do
Damit mir denn alli zäme dr Rotgrat hand chönne näh
und durab abgeilet sind statt weder z'stägereää

Dr Mittwuch faht mit Räge aa
doch das gseht me üüs ned aa
Dr Namidaag isch schnäll scho do
und mir händ die Boulder gnoh
Ufe, abe, Prusik, Bähnli
und mit Rägegutsch hei
und händ döt halt Chueche, Snickers, Wii und Bierli gnoh

Am Dunschtig stoht en Hochtour a
De Rodüner Chopf ischs Ziel
vel Gröllhalde losi Stei
de Wäg esch käs eifachs Spiel
Ufem Gipfel nöblets rächt
ond mer stuhne all ned schlächt
s'Gipfelchrüz esch nur dank lila BH no stabil

Am Fritig esch de Gletscher s'Ziel
de Schnee isch ois chli zviel
stampfe, rätsche, schimpfe, laufe
denn es wartet s'Seilbahnspiel
Met de Rolle laufts wie gölt
uf'd'Brämser chömmer ois verloh
Gottseidank send alli gsond ond fit durd Woche cho

Em Dani si Fründ

Mit Silbernagels Daniel
isch s'chlättere steil und s'wandere schnell

Fidiralala, Fidiralala, Fidiralalalalaa

Falls d'Friends debii verlore hesch
verloh di nie uf dini Gäscht

Fidiralala, Fidiralala, Fidiralalalalaa

Danke Dani für din unermüedliche Isatz, dini gueti Lune und dini Geduld und mir hoffe, dass mir dir dr verlorene «friend» würdig ersetze in Form vo ächte Fründe...